

"Ш" ХАШАЛГАН

Табатай Саяанда "Ш" хашалганай орондо "С" хашалган үгүүлхэдэнь, тон зохид байба. Энээндэ ханаагаа зобоһон хүгшэн эжнынь ашадаа:

— Намайе дахаад "Шарик" гэжэ хэлэ,— гэбэ. Ашань тэрэ дороо:

— Саяан,— гэжэрхибэ. Хүгшэн эжнынь:

— Шүрэб! — гэжэ эршэтэйгээр дуугарба.

— Хадааһан! — гэжэ хэлээд, ашань хулгай нюдөөрөө хараад байба.

Бодолгото болоһон хүгшэн эжнынь:

— Шандаган,— гэбэ сухалтайгаар.

— Туулай,— гэжэ тэрэ дороо хэлээд, үшөө ямар үгэ хэлүүлхэнь ааб гэнэндэл, хүлээгээд байба.

Хүгшэн эжнынь "Ш" абыатай ондоо үгэ ханажа ядахадаа:

— Үнээгээ һаахам,— гээд, газашаа шамдуухан гараба.